

Obrazovanje o civilnom društvu i osnaživanje lokalnih zajednica

ZASTUPANJE DJEČIJIH PRAVA

Organizacija Save the Children iz Norveške je juna 2006. godine pokrenula projekat izrade Priručnika za zastupanje dječijih prava. Projekat ima za cilj razviti i promovisati model dobre prakse participacije djece u procesima odlučivanja u okviru rada službi socijalne zaštite, sudstva i policije. To namjerava postići preko formiranja grupe eksperata i nacionalnih radnih grupa, koje će sudjelovati u pripremi i evaluaciji programa edukacije zastupnika djeteta i pripremi nacionalnog plana za uvođenje programa Zastupnika djeteta u praksu kao formalan oblik rada. Partneri na trogodišnjem projektu su nevladine organizacije iz Srbije, Crne Gore i Slovenije, a UHD „Priateljice“ iz Tuzle je odgovorno za sprovedbu projekta na području Tuzlanskog kantona. Radna grupa u sastavu predstavnika/ca Ministarstva za rad i socijalnu politiku TK, JU Centra za socijalni rad Tuzla, Općinskog suda Tuzla, Kantonalnog tužilaštva Tuzla, MUP-a TK, Pedagoškog zavoda TK, JU Dom za djecu bez roditeljskog staranja Tuzla, Doma zdravlja, Pravnog fakulteta te nekoliko NVO-a je do sada sačinila Analizu stanja u oblasti dječije zaštite.

PODRŠKA MJESTIMA POVRATKA

UHD „Priateljice“ su od januara 2003. godine počele podržavati proces održivog povratka i povratnike u 4 mjesta: Snagovo, Đulići, Divič i Atmačići, a od jula 2004. godine još u 2 mjesta: Šetići i Vidakova Njiva, sve u opštinama Zvornik i Ugljevik. U ovim povratničkim mjestima osnovani su klubovi za žene i djecu u kojima se pruža edukativna, savjetodavna podrška i kreativne igraonice za djecu.

Osnovni ciljevi su: osnaživanje žena kroz rad ženskih grupa (samopomoć, rad na savladavanju trauma i poteškoća); jačanje žena u njihovoj samosvijesti, kao i njihova reintegracija u društvenu zajednicu; kreativno rješavanje konflikta; suživot i pomirenje između komšija različitih etnija; potpomaganje i zaštita razvoja djece; reduciranje mogućih konflikata, kao i podsticaj i razvoj kreativnosti kod djece; edukacija korisnika putem kurseva, radionica, predavanja, seminara na teme iz oblasti civilnog društva, ljudskih prava, zdravstva, obrazovanja, poljoprivredne proizvodnje, ekologije, poduzetništva, mikrokreditiranja; stvaranje uslova za zapošljavanje kroz pokretanje i jačanje mikroprojekata (razvoj plasteničke proizvodnje), kao i olakšana obrada zemljišta uz pomoć doniranih poljoprivrednih mašina i alatki; osnivanje seoskih zadruga za otkup poljoprivrednih proizvoda; osnivanje ženskih vijeća, kao i ženskih udruženja s ciljem samloadrživosti, kao i participacije u lokalnim organima vlasti.

Aktivnosti:

Najznačajnije aktivnosti koje se realizuju u klubovima su

- redovno okupljanje ženskih i dječijih grupa s ciljem druženja, savjetovanja i educiranja kroz održavanje raznih predavanja / radionica, kurseva.
- održavanje kursa šivenja u Diviču, Đulićima, Vidakovoj Njivi i Šetićima koji je i organizovan prema željama i potrebama žena, a predstavlja jedan od izvora generiranja prihoda ili uštede, jer žene mogu da šiju odjevne predmete za ukućane,
- pokrenute su inicijative i osnovana ženska Udruženja u 4 mjesta: Vidakova Njiva, Đulići, Snagovo i Atmačići,
- permanentne edukacije iz oblasti poduzetništva, pokretanja malih biznisa, razvoja i jačanja mikroprojekta i drugo,
- organizovanje ekskurzija i posjeta između klubova,
- igraonice za djecu.

Djeca su u dječijim igraonicama organizovana u grupe školskog i predškolskog uzrasta. Kroz druženje stvaraju prijateljstva, igraju se, rade domaće zadatke, uče mirne strategije za rješavanje konflikata i ophođenja bez nasilja, razvijaju toleranciju, prihvataju različitosti. Ciljne grupe su žene povratnice razne starosne dobi (oko 500 žena), kao i njihova djeca (oko 220) starosti od 3-12 godina.

Najznačajniji postignuti rezultati: registrovana ženska udruženja u Snagovu, Vidakovoj Njivi, Đulićima i Šetićima, registrovana zadruga u Snagovu, kroz kurs šivenja koji se realizirao u 4 kluba educiralo se oko 100 žena, ostvoreni su rezultati u okviru plasteničke proizvodnje, te ostvarili prihodi od iznajmljivanja poljoprivrednih mašina i prikupljanja članarina od redovnih članica.

Uz podršku Komiteta za ljudska prava i demokratiju iz Njemačke u projektu „Odmor od rata“ ljetovalo je oko 70 djece iz sela povratka. Ostvorena saradnja sa drugim NVO-ima: Taldi, Bospo, Bosanska inicijativa za lokalni razvoj, Međunarodni komitet Crvenog krsta/križa, Švicarski Crveni križ, Amica Educa, UNHCR, UNICEF i dr., kao i sa lokalnim predstavnicima. Mirovne radionice s ciljem pomirenja i suživota u 2006. godini realizovane u osnovnim školama „Desanka Maksimović“ u Petkovicima i „Sveti Sava“ u Snagovu, u kojima zajednički učestvuju djeca od 4. do 9. razreda bošnjačke i srpske nacionalnosti. Radionice su realizovane dva puta mjesečno u navedenim školama. Najznačajnije teme ovih radionica su: Umijeće afirmacije, Vještine aktivnog slušanja, Nenasilna komunikacija, Saradnja ili kooperacija, Gubitak i žalovanje, Životni kontinuum, Gubitak i odvajanje, Ljutnja i bijes, Otpuštanje prošlosti i dr.